

Jelani dakwa jadi mangsa kesilapan teknikal

UM 1 OCT 2001
Oleh NAZERI NONG SAMAH

KOTA KINABALU 30 Sept. — Ketua UMNO bahagian Bandau, Jelani Hamdan, 36, yang dilucutkan jawatannya oleh Lembaga Disiplin UMNO mendakwa beliau telah menjadi mangsa keadaan akibat kesilapan teknikal tuduhan melanggar peraturan parti yang dibuat ke atasnya.

Menurut Jelani, antara perkara yang dinafikan ialah beliau dituduh melakukan perbuatan itu di Hotel Berjaya Palace, Kota Kinabalu pada pukul 9 pagi 28 April 2001.

“Saya sendiri hairan mengapa saya dituduh berada di Hotel Berjaya Palace, sedangkan pada tarikh dan waktu yang sama saya berada di hadapan jawatankuasa Lembaga Disiplin UMNO di Perhubungan UMNO Sabah.

“Ketika itu saya yang juga Ketua Pemuda UMNO bahagian Bandau membela diri atas tuduhan melanggar peraturan parti pada pemilihan untuk jawatan Ketua Pemuda pada April lalu,” jelasnya.

Tambahnya, hukuman yang membawa perlucutan jawatan sekarang ialah bagi tuduhan melanggar peraturan parti untuk merebut jawatan Ketua UMNO bahagian Bandau dari penyandangannya, Datuk Saidi Suari.

Beliau yang juga tokoh korporat dan seorang peguam menyatakan demikian pada sidang akhbar bagi membuat penjelasan mengenai hukuman yang dijatuhkan ke atasnya itu di sini hari ini.

Jelani didapati bersalah melanggar peraturan parti dalam pemilihan bahagian pada April lalu bersama-sama 13 orang lagi anggota UMNO di seluruh negara yang diumumkan oleh Pengerusi Lembaga Disiplin UMNO, Tan Sri Tengku Ahmad Rithauddeen di Kuala Lumpur pada Jumaat lalu.

Hukuman yang dikenakan ke atas Jelani ialah menggantung hak-hak untuk memilih, dipilih dan dilantik untuk sebarang jawatan di dalam parti seperti di bawah Fasal 6.2.2 Perlembagaan

UMNO selama tempoh satu penggal pemilihan di peringkat cawangan, bahagian dan majlis tertinggi mulai 14 September 2001.

“Saya akur dengan hukuman oleh Lembaga Disiplin UMNO itu yang dianggotai oleh golongan profesional dan berpengalaman, tetapi saya juga akan membuat rayuan kepada sekretariat bebas untuk menjelaskan masalah teknikal tuduhan dan surat menyurat daripada lembaga itu kepada saya,” katanya.

Menurut Jelani, surat kedua untuk hadir membela diri pada 28 Julai 2001 kepadanya bagi tuduhan melanggar peraturan parti untuk pemilihan ketua bahagian telah disalah hantar ke peti surat lain oleh Lembaga Disiplin UMNO.

“Peti surat saya di Kudat, Sabah ialah bernombor 391, tetapi pada surat panggilan itu ditulis 291 masuk ke peti orang lain dan hanya sampai kepada saya 12 hari kemudiannya sekali gus menutup peluang saya untuk hadir membela diri di hadapan Lembaga Disiplin UMNO yang datang ke Sabah,” katanya.

Jelani menambah, beliau juga akan mengutus surat kepada Presiden UMNO, Datuk Seri Dr. Mahathir Mohamad mengenai masalah yang dialaminya ekoran daripada tindakan Lembaga Disiplin UMNO tersebut.